

**Poloni Iye Timoti Pipia Kumbe
Lepa Topa Tirimu Ungumu
1 Timoti
I Ungu Torumumunga Ungu
Pulu Mare**

Poloni Kraistingu imbo Efesus kombuna moloringima Timoti tapu tepa nokopili nimbe yu purumu. Anjo molopalie Timoti Kraistingu imboma tapu tepa nokopa kondombalo mele mane tipelie i pipiamu topa mundurumu.

Goteni enonga tapu iyema toya toko molangei nimbe enge tipili.

**Poloni Timotindo Nunge Ulu
Tenioma Kinye Kraistingu
Imbomani Ulu Tengema Kinye
Wamongo Nokoko Kondowi Nimu
Ungu Mare**

Poloni i pipiamu tombaindo oi pulu polopa torumu ungumu

¹ Na Pol, Jisasi Kraistini nanga kongonomu tendepuwi nimbe lipe mundurumu iyemu. Lino Tepa Lipe Mindili Nolemala Aulkena Wendo Ltimu Gote kinye lino paa tepa kondombalo nimbo konopu tipo nokopo moromolo iye Kraist Jisasi kinye na kanoko liko i kongonomu tendepuwi ningilina aku tepo andopo nimbo tiro iyemuni ² nu Kraistingu iyemu molko kondani

nimbo nani nu nokoro, nu kinye ilto Kraistinga iye talo morombolomunga nu nanga kandi malo Timoti i pipiamu topo tiro. Lapa Gote kinye linonga Awili Kraist Jisasi taloni nu kinye konopu noiko teko kondoko, nuni wali te ulu mare teko kenjinio kinye nu kondo kolko mindili nani naa ningi, nu konopu ame topili taka liko molani nengili.

*Ungu kolo tolima mane tirimele imbomani
nimele unguma naa pilipo umbulu timolo ungumu*

³ Nani kombu Masedonia provins pumboindo nu enge nimbo walipo pilipolio kombu awili Efe-sus molani niu kano mele kinye nu akuna we molani nio. Iye mareni akuna kolo toko ungu lupema mane tiko moromele kani akuna we molko kano iyemando aku ulu naa teaio niwi nimbo nu walipo pilto. ⁴ Aku iyemani Juda imbomanga kangema toko anda kolepalemanga imbima tule teko toko kau moromele ungumani enonga konopuma topa beambo tipe, ungumanga pulumu pilingeindo we opa karaye kau tengen aulkemu akirindipe, Gotenga ungu paimboma pilinge aulkemu pipi tirimo kani enondo aku ulu naa teaio niwi. Kano iyemani mane tirimele ungumani Gote pimolo aulkemu naa akirindrimo. Gotenga ungumu kinye, yuni lino kinye tembo nimbe, nimbe panjirimu uluma kinye, Kraist Jisasi molopa linonga nimbe tenderimu mele akumu paimbo nimbo enge nimbo pimolo ulumuni kau aku taloni kau pimolo aulkemu akirindrimo. ⁵ Kano iyemani ningi kenjiko imboma teko embambo tirimele iyemando aku

teko naa teaio niwi nio mele Kraistinga im-boma nendo yando enongano konopu mondoko molangei nimbo kano iyemando aku teko niwi nio. Paimbo ningo enge ningo pimele ulumu paa paimbo teremele ulumu kinye, konopu kake teli ulumu kinye, konopuni pilkolio Goteni kanopa keri karomo ulu keri te konopuna naa peremo lepamo ningo pileli ulumu kinye, aku tepa konopu penga peremo imboma andi yando enongano konopu mondoli ulumundo nio. ⁶ Imbo mare aku tepa konopu pengama naa pepili molko aku ulu pengama tiye kolkolio we unguma kau ningo keke lepo toromele. ⁷ Mosesini Gotenga ungu manema pilipelie yando nimbe tirimu ungu manemanga mane tilima molamili nimele nalo ungu manemanga puluma naa pilko, enge ningo mane tingeindo nimele ungumanga puluma eno enongano wamongo naa pimele.

⁸ Lino pimolo, Mosesini ungu mane tirimuma tumbi tipo pilipo, aku ungu manemanga ungu pulumu wambo pilipolio ulu akuma temolo kinye aku ungu manema paa penga nimbo pimolo. ⁹⁻¹⁰ Kano ungu manemani kongono wamba tepa teremo mele kanopolio kano ungu manema penga nimbo pimolomunga ungu pulumu i tepe: Goteni ungu manema timbeindo tumbi tiko moromele imboma pilko teangei nimbe naa tirimu. Ungu manema toko tangondoko kalambo naa nimele imboma kinye, Gotenga unguma liko umbulu tiko ulu pulu kerima teremele imboma kinye, Gotenga unguma naa pilko ulu kake telima pilipo teamili naa nimele imboma kinye, imbomani enonga anupili lapali toko

kondoromele imboma kinye, imbo lupema toko kondoromele imboma kinye, wapu ulu kerinale teremele kango imboma kinye imbo yuma kinye, kombu awili Sodom imbomani iyema enongano ulu kerinali teko amboma enongano ulu kerinale teringi mele teremele imboma kinye, maket tepo kou liemili ningi imboma wapu ltimele imboma kinye, kolo toromele imboma kinye, kotena pungo paimbo nimolo ningi panjikolio kolo toromele imboma kinye, Gotenga unguma pilipo Kraistinga imboma teko molangei nimbo mane tirimolo ungu lupema peya topa tangondambaindo ulu kerima teremele imboma pali kinye, Mosesini tirimu ungu manemani aku ulu teko kenjiko moromele imboma pali nokopili nimbe Goteni aku ungu manema pepili nimbe, nimbe panjirimu. ¹¹ Gotenga unguma mane tirimolo ungu paimbo akuma Goteni na kanopa lipe andoko ningi tiwi nimu unguma kinye tendeku tipe. Aku ungumu paa penga olandopamu, imbi paa peremo Gotenga ungumu.

Poloni Goteni yu kondo kolorumumunga paa tereno nimu ungumu

¹² Jisasi Kraist linonga Awilimuni i kongono tenderomunga engemu tipelie na kanopa penga pilipe nanga kongonomu tiye naa kolopa manda tepa kondombalo nimbe pilipelie i kongono tenderomu na tirimumunga yundo paa tereno nio. ¹³ Paimbo oi yunge imbimu lipo ungu takatondopo, yunge imboma kinye opa pule topo mindili tipo topo kondomboi teru nalo yu paimbo Gotenga Malo molopa Goteni lino nokopili nimbe

maina lipe mundurumu iye Kraist molorumu mele pilipo tundupolio, Yunge temanemu toringi pilipolio kolo toromele nimbo enge nimbo pileru mele akumu tepo alowa terumunga yuni kanopalie na kondo kolopa mindili nopili naa nimu. ¹⁴ Nalo na Kraist Jisasi kinye peya tapu topo molorumbulu kala linonga Awilimuni na paa we kondo kolopalie, Yu paimbo nimbo enge nimbo pileli ulumu kinye imboma konopu mondoli ulumu kinye kano uluma Awilimuni na olandopa tirimu.

¹⁵ Lino ulu pulu keri terimulu imboma lipe tapondopa, mindili nolemala aulkena wendo lipe yu kinye peya molopo kondomolo aulkena lipo mondambo nimbe Goteni maina lipe mundurumu iye nomi Kraist Jisasi maina manye orumu. Aku ungumu paa paimbo ungumu. Imbomani konopu talo naa pepili paimbo aku ulu terimu ning paa enge ning pilko ipuki tiengei. Aku temolo kinye paa ku naa pemolo. Ulu pulu keri teremele imbomanga na ulu pulu keri awini terumunga na iye kiyendomu, ¹⁶ nalo Kraist Jisasini imboma konopu topele tangei nimbo taka lipo nokopo ame topili moro. Nani paimbo manda lipe tapondombalo ning pilinge imboma paimbo kondo kolopo lipo tapondopo, koinjo molko kondoko kau punge ulu pulumu timbo ning kanangei nimbelie na ulu pulu keri olandopa teru iyemu oi kondo kolopa tepo kenjirumunga mindili naa namboi nimbelie lipe tapondorumu. ¹⁷ Waliwalima molopa kau puli iye nomi kingimu molopa, kolopa naa kolombalo iyemu molopa, imbo teni naa karomo iyemu

molopa, yu tendekumu kau paimbo Gote molopa, aku tepa moromo Gote yu kau imbi ola molopa enge pepa, enge nimbe pa tepa, aku tepa molopa kau pupili! Aku tepa kau nemili! I paa.

*Poloni Timotindo ulu kerima kamukumu
mainye pupili ning enge ning kongono tewi nimu
ungumu*

¹⁸⁻¹⁹ Nanga malo Timoti, Gotenga ungu nimbe mundulima Kraistainga iye mareni nu molonio mele oi ning tirangi mele pilipolio nu paa aku teko teani nimbo, nimbo tiro. Imboma teko kenjiko molangei nimele melema mainye pumbe, Gotenga kongono tepo moromu enge pepili kani enge nimbo opa paa teambo ningolio nu tenio mele oi ning tirangi ungu akuma pilko liko teani. Kraist Jisasi paimbo ning enge ning pino mele tiye naa kolko, waliwalima konopuni pilkolio Goteni kanopa keri pimo ulu keri te nanga konopuna naa peremo. Kongono teroma tepo kondoro lepamo ning pilko molani! Aku ulu talo ambolkolio opa enge nimbo teambo ning nu tenio mele oi ning tirangi ungu akuma paa pilko liko teko molani. Imbo mareni kano ulu talo naa tembo kinye ulure molo ningimunga, nona andoli sip te nona kou teni topa bulturumo kinye paa keri lemo mele kano imboma aku teko mele ipuki terangi ulumu paa kamukumu keri lierimu. ²⁰ Aku terangi imbomanga iye Himeneus kinye Aleksander kinye elo aku teko teringili kinye kuromanga nomi Satan mindili lipe tipili mindili nangili niu. Aku teko molko kenjikolio Gote ungu taka tondoko yunge imbimu teko naa kenjingele mele pilengili nimbo aku ulu teru.

2

*Kraistingu imboma maku toko molko Gote popo
toko kapi ningi Yunge imbi liko ola mundundunge
mele ungu mane te*

¹ Manda, nani eno teangei nimbo ulumanga oi kumbe lepo enge nimbo teangei nimbo niomu i tepa, Imbomanga pali Gotendo unguma nindiko, konge tendeko, eno tapondopili nindiko, paa tereno ningi nengei. ² Eno nokoromele iye nomi kingima kinye gavman imboma kinye akumanga Gote konge tendangei. Gote kanopa penga pimo uluma tepo molopo konopu kake tepili molopolio lino waye taka lipo molamili ningolio aku ulu teangei. ³ Aku uluma penga itemo. Lino Tepa Lili Gote aku uluma kanopa penga pimo. ⁴ Gote yuni imboma pali mindili nolemala aulkena wendo ongo na kinye peya molko kondonge aulkena pungo, ungu tukumemu pilko ambolonge lemo paa konopu lepa moromo. ⁵ Akumunga ungu pulumu i tepa, Gote tendekumu kau moromo; iye tendekumu kau Gote kinye lino maina imboma kinye linonga tuku tingina moromo, aku iyemu yu Kraist Jisasi. ⁶ Goteni wai panjirimu wali Kraistini yu imbomanga pali kolo wangopa kolorumu ulumuni imboma kot kamukumu tame tepa kololi ulumunga wendo ltimu. Aku ulu terimumuni Goteni imboma waye tepa limbei teremona lipo manjirimolo. ⁷ Kraistini nanga ungumu pungo ningi tindiko, nanga kongonomu tendepuwi nimbe na lipe mundurumu akumunga pulumu Gote kinye imboma kinye popo tiko molonge aulkemu

akirindimbeindo kolorumu kanomu. Kolo naa toro. Paimbo nio. Juda imbo naa moromele imbo lupema paimbo ning enge ning pilinge ulu paimbomu eno mane tiemboi nimbe na lipe mundurumu.

⁸ Aku kani kombu lupe lupemanga pali Kraistinga imbomani Gote popo toko kapi ningeindo maku toko molonge kinye linonga kangi konopuma pali Gotenga ning konopu kake tepili molonge imboma Gote kinye ungu nemili ningolio, mumindili kolko opa karaye tengen ulu te naa pepili ki ola munduko Gote kinye ungu nengei.

Ambomani ulu pengama teko molko kondangei nimbe ungu mane tirimu

⁹ Ambomanga ungu te i nio. Iyemani lino kanoko eio konopu leangei ning wale pakoli pengama naa pakangei. Au nombe nombe naa tondaio. Enonga pinyendima au tiko, kou goloni teli melema kinye kulumbu penga kou mone olandopa purumoma kinye, akumani enonga kangima au tiko wale pakoli kou olando pulima pakoko, naa teangei. Enonga mandana pakoromele mele aku teko pakangei. ¹⁰ Imbomani lino kanoko penga kanangei ningolio ulu tumbi nilima kau teangei. Aku uluma Gotenga amboma moromolo ning yunge ungumu pilko moromele amboma au tinge mele pengama.

¹¹ Kraistinga imbo maku toko molongena amboma taka liko molko unguma naa ning, Gotenga unguma wamongo pilko, unguma pilko liko molangei. ¹² Ambomani iyema naa nokoko, Gotenga unguma mane naa tiengei nio. Unku

naa ningko taka liko molko pilengei. ¹³⁻¹⁴ Goteni iye Adam oi kumbe lepa tepe, altopa ambo Ipu terimu. Pele kuromanga nomi Sataneni kolo topa kondi torumu unguma Adameni paimbo nimo nimbe kumbe lepa pilipe naa ltimu. Ambomuni kolo toromo ungumu paimbo nimo nimbelie Goteni nimu ungumu topa tangondopa ulu pulu kerimu terimu. Akumunga amboma aku teko taka liko molangei. ¹⁵ Aku paimbo nalo amboma Kraist Jisasi molopa tenderemo mele paimbo ningko enge ningko pimele mele tiye naa kolko waliwalima enge ningko pilko kau molko, waliwalima imboma konopu mondoko, lino Gotenga amboma molamili ningko yuni ulu kake telima nimbe karomo uluma teko, enonga imbima teko mainye munduko taka liko molkolio, bakulu menge kinye Goteni eno molko kondangei nimbe lipe tapondombalo.

3

Kraistingu imbo talapemanga nokoli iyema teko molonge ungumu

¹ I ungu tukume nimboi. Iye teni Kraistingu imbo talapemu nokamboi konopu lemo lemo kongono tukumemu konopu mondoromo. ² Akumunga Kraistingu imbomanga nokoli iyemu molombalo iyemu yu iye paa tumbi nili iye te molopa, imbomani kanoko keri pilinge ulu te yu kinye naa peli iyemu molopili. Nokoli iye molombalo iyemu yu ambo tendekumunga iyemu molopili. Yu molopa kondopa, ulu pengama kau konopu kimbo tipe, konopu lepa

kondombalo imbomani yu kanoko penga pilko yunge unguma liko awili tinge ulu pengama kau tepe, yunge ulkena onge imboma tukundo wangei nimbe nokopa kondopa, Gotenga unguma imboma paa pilengei nimbe tumbi tipe mane timbelo ulumu lipe manjipe, aku tepe iyemu molopili. ³ No nomba keke lepo naa topa, imboma kinye mumindili welea naa kolopa opa naa tepe, imboma kinye taka lipe molopa, kou mone olandopa konopu naa mondopili. ⁴ Yunge ambomu kinye bakuluma nokopa kondopa, yunge bakuluma yunge unguma taka liko pilko liko tenge tiko teangei mele mane tipili. ⁵ Iye teni yunge ambomu kinye bakuluma manda naa nokopa kondomo lemo Gotenga imbo talapemu nokombalo kongonomu manda naa tembalo. ⁶ Kraistingu imbo talapemu kokele tukundo ombalomuni yu iye pengamu konopu lepalie yu none tembalo aku wali Goteni oi Satan kot tendepa mainye mundurumu mele iye akumu aku tepe kot tendembalo kani kokele tukundo ombalo iye nokoli kongono manda naa tembalo. ⁷ Kraistingu imbo talape tawendo moromele imbomani iye te kanoko imbi keri tirimelemuni nokoli kongono temo lemo Sataneni ungu keri nindirimelemuni aku iyemu melu mele lepa poimbelo. Akumunga nokoli iye molombalo iyemu tawendo molonge imbomani yu kanoko penga pilko yu iye toya tolimu ninge iyemu aku Kraistingu imbo talape nokoli iyemu molopili.

Kraistingu talapemanga tapu iyema teko molonge ungumu

⁸ Kraistingu imbo talapemunga tapu iye molongema eno kape i teko mele molko kondangei. Imbomani eno kanoko penga pilko enonga unguma liko awili tiko, eno linonga tapu iyema molonge lemo paa ninge uluma tekolio kongono tengindo wamongo pilko taka liko tengeniyema molko; konopuna ungu lupe liko manjiko kerena ungu lupe ningaaku ulu naa teko, imbo marendo ungu lupe ninga marendo alowa teko ungu lupe ninga naa teko; no enge nili awini nongo keke lepo naa toko, Kraistingu imbomanga kongono tendepolio kou mone awini limbo konopu lengei iyema naa molangei. ⁹ Aku iyema lino Jisasi Kristini linonga nimbe tenderimu lipe tapondoromo mele paimbo nimbo enge nimbo pimolo imboma Goteni ungu lopeke terimuma nimbe para tirimu ungu paimboma paa ambolonge iyema molangei. Enoni ungu paimboma ambolongeindo konopuni pilkolio Goteni kanopa keri pimo ulu te konopuna naa peremo, kongono teroma tepo kondoro lepamo ninga pilkolio, ungu paimboma ambolangei. ¹⁰ Tenge uluma oi manda manjiko kanokolio, eno molko kondoko, imbomani kanoko keri pilinge ulu te eno kinye naa pepili molonge lemo Kraistingu imbo talapemunga tapu iyema manda molonge.

¹¹ Enonga amboma kape, imbomani kanoko keri pilinge uluma naa teko, uluma tengenye mele wamongo teko pilko taka liko teko molonge amboma molko, imbo tenga ungu umbulkondo naa nindiko, molko kondoko, enonga kongonoma toya toko pilko teko kondonge amboma molangei.

¹² Kraistingu imbo talapemunga tapu tembalo

iyemu yu ambo tendekumunga iyemu kau molopili. Yunge ambo bakuluma nokopa kondopa, yunge bakulumani yunge unguma wamongo pilko liko, liko awili tiko molonge mele mane tipe kondopili. ¹³ Kraistinga imbo talapemunga tapu teko kondonge iyema imbomani liko awili tiko enonga imbima kapi nimele kape, Kraist Jisasi paimbo ningo pimele mele olandopa enge ningo pilkolio, aku teko enge ningo pimele mele pipili naa kolko imboma tumbi tiko ningo tinge.

Poloni Timoti i pipiamu topa tirimumunga ungu pulumu

¹⁴ Nu kanambo nimbo nu moronona nondopo paa wambo konopu lepolio nalo i pipiamu oi nu timboindo toro. ¹⁵ Nalo ulu teni na pipi timbelo kinye manda nondopo naa ombonje kani nimbolio Gotenga imbo moromelema teko molonge mele pileni nimbo i pipiamu oi topo tiro. Aku imboma koinjo molopa kau puli Gotenga imbo talapemu. Aku talapemu ungu paimbomu lipe tapondopa enge nimbe pepili nimo talapemu. Ungu tukume akumu ulkemu mele, Gotenga imbo talape akumu ungu tukumemunga ulke timumuni angimo aku tepa enge tirimo.

Gotenga ungu pulumuaku ulu paa olandopa

¹⁶ Oi Gotenga ungu te yuni mane tirimu ungu lopeke terimumu kinye mona nimbe para tirimuaku ungumuni lino Gotenga imboma molopo yuni kanopa penga pimo uluma temolo mele lipe ondoromoaku ungumunga ulu pulumu paa enge nilimu, imbomaniaku ungumunga pulumu

manda teko mainye naa mundunge. Aku ungu pulumu i tepa,

Yu maina iye te omba mona molorumuna im-bomani kanoringi. Yu ulu pengama tepa molopa kondorumu mele Mini Kake Telimuni lipe ondorumu.

Mulu kombuna enselemani yu kanoringi. Yunge temanemu mai kombuna pali yunge imbo-mani toko tilko andoringi.

Imboma kano temanemu pilkolio paimbo ning enge ninggo pileringi.

Goteni yu mulu kombuna olando lipe, yu oi iye enge nilimu molorumu kombu enge nili pa telina mepa pumbe mondorumu.

4

Imbo mareni kolo toko nimele ungumani imbo-manga konopuma tepa beambo tindirimo ungumu

¹ Kinye ulu mare wendo oromomunga ungu mare Mini Kake Telimuni i tepa tumbi tipe nimbe para tirimo. Altopa wendo ombalo walimanga kolo toli kuromani ungu ningema kinye, kuro mareni mane tinge unguma kinye, imbo mareni pilkolio Kraist paimbo ning enge ninggo pilinge ulumu tiye kolonge. ² Aku unguma iye topele mapele tolimani kolo toko mane tirimele. Aku iyemanga konopu naa pepa, enonga konopuni naa pilko ulu pulu keri teremelema naa pilko moromele. ³ Aku iyemani mane tikolio ningeindo, iyema ambo naa liko amboma iye naa pangei ning, langi mare imbi tikolio aku langima kalaro moromo kani mi toko naa naio ninge. Nalo langi

akuma Goteni lino Jisasi yu paimbo nimbo enge nimbo pilipo, ungu paimboma pilipo limolo im-bomani nangei nimbe terimu. Aku langima lipo Gote kinye paa tereno nimbo nomolo kinye ulure molo. ⁴⁻⁵ Goteni terimu melema pali pengama. Gotenga ungumu kinye linoni Gote kinye ungu ni-molo ungu taloni langi kinye melema pali Gotenga mele kake telima lembalo akumunga langi akuma tiye kolko naa nonge kinye manda molo. Gote kinye paa tereno ningko liko nonge kinye manda lipo nomolo.

Timoti Kraistingu kongono tendeli iye pengamu molombalo nimu

⁶ I nio mele nunge Kristen angenali aku teko teangei ningko mane tinio kinye nu Kraist Jisasinga kongono tendeli iye pengamu molonio. Lino ungu pengama paimbo nimbo enge nimbo pimolo unguma kinye Kraistingu ungu puluma mane tirimuluma kinye oi kape altopa kape pilko liko teko moronoma pilko liko tenio kinye nu kinye enge nimbe pepili molonio. ⁷ Unku timborimbo ungumu Gotenga ungumu topa mainye mundumbei teremoma kinye kange kerima toromele akuma umbulu tiko, Goteni kanopa penga pimo uluma kau pilipo teambo ningko aku uluma wamongo teko pilko kondoko teko molowi. ⁸ Paimbo kangimu enge nipili nimbo ulu mare teremolo kinye akumu penga. Aku teremolo kinye kangimu paimbo enge nimomunga paimbo lino alaye kolte lipe tapondoromo. Nalo Goteni kanopa penga pimo uluma wambo pilipo temolo ulu akumu paa

olandopa pengamu. Aku temolo ulumuni lino lipe tapondopa, kinye ya maina moromolo mele kinye pele mulu kombuna molomolo mele kinye timbelomunga akumu paa olandopa kani Goteni kanopa penga pimo uluma wamongo pilko teko molowi.

⁹ I nio ungu akumu paimbo. Aku ungumu imbomani konopu talo tepa naa pepili kamukumu pilko ipuki tinge. ¹⁰ Waliwalima koinjo molopa kau puli Goteni imboma pali Tepa Lipe Mindili Nolemala Aulkena Wendo Ltimo Iyemu yuni paimbo lino yu ipuki timolo imboma lipe tapondopa mindili nolemala aulkena wendo ltimo. Aku teremomunga lipo manjipolio, Yuni lino lipe tapondopa tepa kondombalo nimbo nokopo molopolio lino yunge kongonoma enge nimbo paa mindili nombo teremolo.

¹¹ I ungu nioma pali Kraistinga imboma pali ningi tiko, teangei ningi mane tiko molowi. ¹² Nu iye kokelemu, nalo imbomani nu iye yumu molo, nu lipe manjili naa peli iyemu konopu leko nunge ungumu umbulu timolo konopu naa leangei. Nunge ungumu pilko liengei ningi molowi. Nuni ungu pengama ningi, molko kondoko teko andoliko, imboma paa konopu mondoko, Kraist ipuki tiko, Goteni ulu kake telima nimbe karomo uluma teko, aku tekolio Kraist paimbo ningi enge ningi pimele imboma na molopo tembo mele manda leko molko tengen mele kanangei ningi aku ulu tewi. ¹³ Na oi wellea naa ondu lemo, nuni Gotenga bukuna ungu moromoma imboma pilengei kambu toko, aku ungumanga ungu puluma imboma ningi tiko,

Kraistinga imboma teko molonge mele mane tiko molowi. ¹⁴ Kraistinga imbo talapemunga tapu iyemani nu ambolko Goteni yunge kongonomu teko kondani nimbe lipe tapondopili ningi kinye Gotenga nimbe munduli ungumu iye teni pilipelie yando nu nimbe tirimu kinye Goteni nu kongono teani nimbe enge tirimu akumu nu tiye naa kolowi.

¹⁵ Aku engemu ambolko kondoko kongonoma enge ningi tewi. Aku kongonoma teko kondoko molonio mele imbomani pali kanangei. ¹⁶ Nu molonio mele kinye, nuni imboma mane tinio unguma kinye, aku ulu talo nokoko kondowi. Tiye naa tepili enge ningi aku teko tenio kinye aku teko teniomunga Goteni nu kape nunge ungumu pilinge imboma kape peya lipe tapondopa mindili nolemala aulkena wendo lipe yu kinye peya molko kondonge aulkena lipe mondombalo.

Ambo Waima Kinye Tapu Iyema Kinye Kongono Kendemande We Tendeli Imboma Kinye Timoti Yu Kinye Enoni Teko Molangei Unguma Poloni Timoti Mane Tirimu

5

*Poloni Timotindo imboma kanokolio nanga
pulu ltemo imbo kandima ningi kanowi nimu
ungumu*

¹ Kinye Kraistinga imbo talapena moromelema kinye tenio uluma nemboi. Iye anda te iri naa

towi. Tepa kenjimbelo kinye kanokolio nunge lanie kinye nino mele aku teko ulu toya topo teamili ninggo tiwi. Nunge angenali nokorono mele aku teko iye kokelema nokowi. ² Nunge aminye kinye tereno ulumu aku teko amboma kinye tewi. Goteni kanopa penga pimo uluma nunge keminyeli kinye tereno ulu aku mele ambo wenepoma kinye tewi.

Ambo waima nokonge ungumu

³ Ambo waima imbo mareni eno liko naa tapon-dongema paa liko tapondoko nokani. ⁴ Nalo ambo wai te yunge bakuluma molo yunge bamupilima molonge lemo aku imbomani Gotenga ungumu pilipo teamili ningolio oi kumbe leko enonga imbo pulu lemoma nokoko, aku imboma eno baku-luma moloringi kinye lapali anupilini eno nokoringimunga enoni kinye aku teko pundu toko aku ambo waima liko tapondoko nokangei. Aku teko teremele uluma Goteni kanopa penga pimo-mungaakuulu teangei. ⁵ Ambo wai te yu imbo teni nokombalo imbo te naa moromomunga yu paimbo ambo wai pinyewe akoli moromo ambo akumu Goteni na paimbo lipe tapondopa nokom-balo nimbe pilipelie ipu leli tangoli kape Gote kinye ungu nimbe liko tapondowi nimbe konge tepe moromo. Aku tengenambo waima liko tapon-doko nokonio kinye aku paa. ⁶ Ambo wai te yu yunu konopuni pilipe wapera topa uluma teremo ambo akumu yu paimbo we moromo nalo ambomu kololi imbo mele moromo. ⁷ Aku ambo waima kinye enonga imboma kinye imbomani kanoko keri pilinge uluma naa teangei ninggo eno

aku teko mane tiwi. ⁸ Imbo teni yunge anumu lapa talo kinye kemulupili angenupili mele te molo ltemo molo umbuni te peremo kinye naa lipa tapondopa nokopa, yunge pulu ltemo imbo wema kinye naa nokomo lemo aku teremo imbomu aku tepa teremomunga yu Kraist paimbo nimbe enge nimbe pimo mele tiye kolopa umbulu tipe, paa tepa kenjirimo. Kraistinga imbo naa molko tawendo moromele imbomani teko kenjirimele ulumu mandopa, aku imbomuni tepa kenjirimo mele olando.

⁹ Kraistinga imbo talapena moromele ambo waimanga imbima pipiana mondamili ningolio, ambo wai mare, paa amboi leko, iye tendekumu kau purumuma aku ambo waimanga imbi mondangei. ¹⁰ Aku ambo waima enoni oi teringi mele pilengei! Oi enonga bakuluma langi tiko nokoko kondoko, imbo ponengema ulkena wangei ningokokonoko, Kraistinga imbomanga kongono kendemande tendeko, umbuni peremo imboma liko tapondoko, aku teko ulu pengama enge ningoteko moloringi mele ningotinge pilinge ambo waimanga imbima kau mondangei.

¹¹⁻¹² Nalo kokele ambo waimanga imbi naa mondangei. Eno Kraist konopu mondoko pimele mele iye te lupe konopu mondoko pilinge ulumuni tepa mainye mundumbelo kinye oi kokele ambo waima molkolio Kraistinga kongonomu kau tendepo molomolo ningotingo, ningotinge ungu tiye kolonge kinye Goteni eno teko kenjiringi nimbelo kani enonga imbima ambo waimanga imbima kinye popo tiko naa mondangei. ¹³ Ulu te i teko teremelela. Eno imboma kinye we

unguma nimbo kopu tepo molamili ningi imbo-manga ulkemanga andokolio kongono naa teko tiye kololi ulumu kau pilko liko teremele. Aku kau molola. Imbomani ulu te teremele mele naa kanoko imbomanga anjo anjo we nindiko temane toko tilko andoko, imbo mare ulu teko ungu nimelema paa pilemili ningi andoko waliko pilko komu tendeko moromele. Imboma ungu kiyengo ningi nimelema wapu pilko anjo pungo ningi tirimele. Aku ulu teremele mele lino kanopo keri pimolo uluma eno andoko teremele. ¹⁴ Aku ulu teremelemunga nani kokele ambo waima tengen ulu i tepo nio: Eno altoko iye pungo, bakulu meko, enonga iyema kinye bakuluma kinye nokangei. Aku tengen kinye linonga opa pule imbo teni enoni teko molonge ulu te kanokolio lino Kraistingu im-bomanga umbulkondo ungu keri te manda naa nindinge. ¹⁵ Mare oi moloringi mele oi tiye kolko umbulu tiko kuromanga nomi Satan lombili purumele.

¹⁶ Ambo te Kraist paimbo nimbe enge nimbe pimo ambo te yunge pulu lemo ambo mare ambo waima moromelema aku ambomu yuni eno lipe tapondopa nokopili. Kraistingu imbo talapemuni aku ambo waima nokongeindo umbuni te naa tepili. Kraistingu imbo talapemuni imbo te naa nokoromo ambo waima kau nokamili ningi aku ulu teangei.

Kraistingu imbomani enonga tapu iyemani kongono teko kondoromelema nokoko kondangei nimu ungumu

¹⁷⁻¹⁸ Gotenga bukuna ungu te nimbe moromo kaniaku teko teangei. Aku ungumuni nimbeindo,

Rais wit mongoma wendo pupili ningi kongi kaoma wit unjoma andoko kambulunge kinye eno wit mare naa nangei ningi kerema pipi tinge wali manda naa tembalo kani pipi naa tiengei, (Lo 25:4)

aku tepe ungu te moromo. Ungu te moromola, akumuni nimbeindo,

Kongono teremele imboma melema liengei, nimbe moromola. Akumunga Kraistinga imbo talapemu paa nokoko kondoromele tapu iyema Kraustinga imbomani wale pakoko mele awinima tiengei. Gotenga ungumu ningi tiko, imboma mane tirimele tapu iyema kiyendo moromele ningi aku teko mele awinima tiengei. 19 Imbo teni nimbeindo, tapu iye teni i tepe tepe kenjimo nimbelo wali naa piliwi! Imbo talo molo yupokoni paimbo aku tepe temo ninge kinye kau paimbo aku tepe temo lepamo ningi pilinio! 20 Tapu iye mareni ulu pulu keri mare paimbo tenge lemo we imboma pilko molangei eno mane tiko ningi amenge tewi. Aku ningi amenge tenio wali we tapu iyema pilkolio pipili kolko lino aku tepo naa teamolo konopu leangei kani tewi.

Timoti yunge tembalo uluma nokopa kondopili nimu ungumu

21 Nani nundo nio ungumu Gote kinye Kraist Jisasi kinye Gotenga enselema kinye akumani paimbo nio ningi molangei nani nundo enge nimbo nimboindo, nuni tewi nio mele paa aku teko tumbi tiko tewi nio. Imboma nokoko teangei ninindo eno kinye pali tendeku tiko nokani. Imbo mare konopu mondonio imboma molo nunge

pulu ltemo imboma kau taka liko nokoko, wema enge ningokoko, aku ulu naa tewi nio.

²² Nuni iye te liko Gotenga tapu iye te molopili ningoyu ki ola noiko kongonona welea naa mondowi. Iyema wamongo kanoko moke tekolio kanoko liwi. Mako tonio iye marenipele ulu pulukeri teko mongo lenge aku wali nu kape umbuni menio akumunga wamongo kanoko tapu iyema mako towi. Ulu pengama kau teko, Goteni ulukake telima nimbe karomo uluma tewi.

²³ Nalo tumbi tipo molambo ningoyimbo nonorono mele aku teko kau naa nowi. Nu kuro takiraki topa nunge olona manda naa teremo kani kuro pora nimbe kangi enge nipili ningowain alaye kolte nowi.

²⁴ Tapu iye marenipulu keri teremelema neya para ltemo akumunga kotena oi naa pangeikot pimo iyemuni oi teko kenjirimele mele tumbitipe pimo. Iye marenipulu keri lopeketeko teremelema oi tumbi tipe para naa lembalono nalo pelekotena mona lembalo. ²⁵ Aku tepala, imbo marenipulu pengama teremelema tumbitipe mona ltemo marenipeleremelema lopeketeperemo, nalo altopa lopekete naa pembalo. Akuma pali mona lembalo.

6

Kongono we tendeli imbomani enonga nokoli imboma liko awili tinge ungumu

¹ Kraistinga iyema moromele imbo kendemandekongonowe tendeli imbomani enonga kongononokoli imbo akuma pengama ningoenonga unguma tengetiko, liko awilitiko

molangei. Kongono nokoli iyema kinye tawendo moromele imbomani tepo kenjimolo mele kanokolio Gotenga imbimu kinye, Kraist ipuki tipolio teremolo ulumu naa ningko kenjengei.

² Kendemande imboma enonga kongono nokoli imboma Kraistinga imboma moromele kinye eno kape lino kinye angenupili moromolomunga enonga unguma pilipo naa limolo kinye ulure molo ningko, enonga unguma umbulu tiko kongono tumbi tiko naa tenge kinye keri. Aku ulu naa teaio! Kongono nokoli imboma linonga angenupilima, enonga unguma pilipo lipo kongono tepo kondomolo kinye eno molko kondonge ningko enonga kongono ningema wamongo teko kondangei. I nu mane tiro mele imboma paa aku teko teangei ningko enge ningko mane tiwi.

Kou mone konopu mondoromelemunga ungu pulu te

³ Linonga Awili Jisasi Kraistinga ungu akumu ungu paimboma kau peremo, kolo toli ungu te naa peremo. Akumu Goteni lino i teko molko kondangei nimbe mane tirimo ungumu kinye, kano unguma iye teni tiye kolopa ungu te lupe kolo topa mane timo lemo ⁴ yu kalambo naa nimbe yunu pimo mele unguma kau ungu penga paimboma nimbe kano unguma kau konopu mondopa na lipe manjili peremo iyemu moro nimbe pimo nalo yu konopu naa peremo, ungu tendekure kape wamba naa pimo. Konopu tiembo nimbe yu ungumanga pulumu imboma kinye keri kuru lipe ungu melenale teremo. Aku tepa teremo

uluman i tepe: Uluma imboma teangei nimo, imbo mareni anjo yando imbi olandopa moromo imboma kanokolio eno kinye konopu keri panjiko, imboma kinye irinale teko, imbomanga ungu umbulkondo nindiko, imbo teni ungu te nimo kinye molo ulu te teremo kinye konopu awini kimbo tiko,⁵ waliwalima konopu tumbi tipe naa peremo imboma kinye irinale teremele. Aku teko teremele iyema ungu paimboma konopuna naa peremo. Enonga konopuni pilkolio, Gotenga kongono tendemolo kinye mele awinima limolo konopu ltemele.

⁶ Goteni tirimo uluma manda teremo nimbe konopu kimbo timo lemo paimbo Gotenga kongono tendembalo imbomu aku ulu tembalomunga mele penga awini limbelo. ⁷ Lino ama kameni meringi wali melte naa mepo we orumulu kano. Altopo kolomolo wali aku tepo melte mepo naa pumolola. ⁸ Wale pakoli kinye langima kape lemo lemo manda moromolo nimolo. ⁹ Imbo mareni mele pulumu noipo imbo kamakomu molamili konopu lekolio kano teli melema lingei teremelemunga kuromanga nomi Sataneni eno kondi topa tepe kenjimbelo. Aku iyemuni konopu aku tepe ltemelemu enonga konopuna melu mele ltemo. Mele pulumu konopu liko mundukolio eno keke lepo toko molko kenjiko kombu kerina kamukumu punge. ¹⁰ Kou mone konopu mondoli ulu akumu ulu pulu keri awini wendo oromomunga pulumu. Imbo mareni kou mone liemboa ningo konopu paa awini liko mundukolio Kraist ipuki tirimelemu tiye kolkolio konopuna tukundo mindili awili

nongo moromele.

Poloni Timoti yu tepa molombalo ulumu mane tirimu ungumu

¹¹ Nalo, nu Gotenga iyemu kani ulu pulu kerima tiye kolko kowa pungolio ulu penga ima kau konopu kimbo tiko teko molani: Ulu tumbi nilima kinye, Gotenga ulu tukumemu kinye, ipuki tili ulumu kinye, imboma konopu mondoli ulumu kinye, ulu pengama teni enge ningo angilko umbuni meko tiye naa kololi ulumu kinye, taka liko mololi ulumu kinye,aku tepa uluma kau tepo molambo ningolow. ¹² Imbo te mele pengamu limbeindo imboma kinye peya keri kuru liko lkirimele kinye paa enge nimbe lkipa tiye naa koromo mele Kraistingu iye paimbo ningol enge ningol pilino iyemu moronomunga paa aku teko mele pengamu liembo ningol keri kuru paa liko enge ningol lkiwi! Nu koinjo molopa kondopa kau puli ulu pulumu paa lipo ambolambo ningol enge ningol lkiko tiye naa kolko molani. Koinjo molopa kondopa kau puli ulu pulu nio kanomu imbo awini pilko molangei nuni paimbo ningol enge ningol pilerinu mele ningol para tirinu kinye Goteni koinjo molopa kondopa kau puli ulu pulumu tiemboi lieni nimbe nu oi alako torumu kanomundo nio. ¹³ Goteni melema pali koinjo pupili nimo iyemu kinye, Jisasi Kraistini Pontius Pailatenga kumbekerena angilipe yunge ungu pulu paimbomu pipili naa kolopa tumbi tipe nimbe para tirimu iyemu kinye, pilko kanoko molangili i kongonomu nu paa tenio mele nimbo tipolio nimboindo, ¹⁴ nu Gotenga kongono tendani nimbo

nu mako torumulu mele pilko Gotenga ungumu nokoko kondoko molowi! Aku ungumu imbo-mani kanoko keri naa kanangei. Nani ulu te tembo kanoko keri naala kanangei ningokalaro mololi uluma kinye ulu kerima kinye naa teko Gotenga kongonomu kau teko kondoko molani. Linonga Awili Jisasi Kraist mona yando ombalo konopu leko nu aku uluma tiye naa kolko teko kau molani.

Poloni Gote kapi nimu ungumu

¹⁵ Jisas yando ombalo waimu Goteni oi mako torumu aku walimunga puwi nimbelo kinye mona yando ombalo. Gote yu molopa kondoli ulu pulumu peremo iyemu. Lino nokoromele imbo-manga engema mandopa, yuni lino nokoromo engemu olandopa. Iye nomi kingimanga pali yu iye nomi king awili olandopamu. Imbo awilimanga yu iye awili olandopamu. ¹⁶ Kololi ulu pulumunga yu kau manda naa kolombalo, waliwalima molopa kau purumo. Yu moromona pa enge nimbe teremomunga lino akuna manda tukundo naa pumolo. Oi imbo teni yu naa kanorumu. Kinye imbo teni yu manda naa kanombalo. Gote yunge imbi olandopa moromomu kinye yunge engemu kape waliwalima pepa kau pupili. I paa.

Poloni imbo kamakomando Gote kau ipuki tiko, imboma kou mone tiko tapaio nimu ungumu

¹⁷ Ya maina mele awini noirimele imbo kamakomando i teko mane tieni: Aku melema keri lembalo kani kalambo naa ningokalaro, mele awini noirimomunga manda molomolo naa nengei. Lino konopu tipo molamili nimbe mele penga awini

tirimo timbelo Gote paimbo lino nokopa kondombo
lindo ninge enge ninge pilko nokoko molangei
niwi. ¹⁸ Aku imbo kamakomando i tekō mane
tieni: Imboma tapoko, ulu penga awini teko, mele
noirimele melema konopu kimbo tiko naa molko,
imbo mele molo lembaloma mare toya toko moke
teko tiengei niwi. ¹⁹ Aku tenge kinye eno altoko
manda molonge ulumunga mele enge awinima
noinge aku wali paa molko kau punge ulu pulu
paimbomu liko ambolonge.

*Timotini yunge kongonomu wamba nokopili
ungumu*

²⁰ Timoti, Goteni nu kongono tirimumu wa-
mongo nokoko kondowi. Mai kombumunga
ungu wema, imbomani Gote naa liko manjikolio
nimele unguma kinye, kolo toli ungumani
Gotenga ungumu beambo timbei teremo unguma
kinye, naa pilko, umbulu tiwi. Aku ungu-
mando kolo toko enonga lipe manjili peremo-
mani nimbo tirimolo nimele. ²¹ Aku unguma
imbo mareni paimbo unguma ninge enge ninge
pileringimunga Gotenga ungu tukumemu oi enge
ninge ipuki tiringi mele tiye kolko aulke tune
tane ningi kani nu kano unguma umbulu tiko naa
piliwi! Goteni eno kinye konopu noipe molopili
molangei. Aku peya nio.

UNGU TUKUMEMU
The New Testament in the Imbo Ungu Language of
Papua New Guinea
Nupela Testamen long tokples Imbo Ungu long Niugini
copyright © 1997 The Bible League

Language: Imbo Ungu

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 11 Nov 2022 from source files
dated 9 Oct 2020

8e236e4f-bf7f-5fe1-a0ea-4f115d5cbf7e